

Kipindji : 16 Kutumikisha kwa makuta bwa bya buntu [Bipeedi]

Kwi bipatulwilo bi bungi mu Eyi dy'Efile-Mukulu pa mwanda wa makuta na kipaso kyakwi atumikisha. Ku banga mafuku akumpala mu [Esambi] suunga Kilombeeno Kikulu, kubaadi lukalo lwa kupudisha myanda ibaadi munkatshi a bantu. Bu kilesheho Abalahama, pabaadi Sala mukashi aye bafu, bakimbile na ba petele mbalo ya kumushika. Baadi mupele bibukopo bwa'shi tabamupanga buntu yaya mbalo aye kuula ku muulo ulombeene na makuta nkama inaka dyadya efuba. Mu mafuku a Abalahama makuta abaadi abeatumikisha mu kipaso kya kwishintusheena.

Mu kilombeeno kikulu pabaadi bena Isalele bu mwilo w'Efile-Mukulu mushii mwa mwiya, ku baadi miya ya kwibaludika mu byabya bilombeene kupa Ayikalayika. « *By'ekumi byoso bya byumbulwa bya mu mafuba enu, suunga mbya bikuba abikala bya Ayikalayika, wawa mushinga waye, su muntu akyeba kukuula kimune kya ku byabya by'Ekumi mulombeene kufuta Tshite-Mwakwidi wawa muulo awutungu na kutenteka kipindji kimune kya mu bipindji bitaano byao. Mu lombe looso lwa ngombe na lwa mikooko mpaa na lwa mbushi, amukabadikwa nyema kitema, nyema ese'ekumi akelwa kitundwilo akileesha'shi nga Ayikalayika* ». Batshite-Bakwidi 27:30-32. MBibaadi bitulwe mu miya'shi kyoso ky'ekumi kya mukupeeta kwa muntu kitudibwe na kupa Efile-Mukulu. Takubaadi muntu baadi bya kupela uno mwiya.

Patutala kalolo mu kilombeeno kipya, bikile buwa atwe kutentekyesha Fumu nabeene. Atubadika : « *Mwanda anuwuku bintu bwa Fumwetu Yesu Kilisto, bibaadi mpeta, bayikeele mu bulanda pa mwanda weenu, bya'shi ku bulanda bwaye nwikale bampeta* ». 2 Bena Kolente 8:9. Baadi « *bepanyine aye nabeene mwanda wa milwisho yeetu, byadya kwitukaasha mu kino kipuungo kii bubi mu kikyebe ki'eshimba di'Efile-Mukulu eetu* ». Bena Ngalaleya 1:4. « *Lutumbu kwi Efile-Mukulu pa mwanda wa kya buntu kyaye kishii bya kwakula* ». 2 Bena Kolento 9:15. Mushindo kini wa tudi bakumbeene kwilwa buno buntu ? Bino mbikumbeene kwitukankamika.

Pabitale kimeeno kyetu ano mafuku; pa uno mwanda mutumibwa Mpolo alesha kwilekeena pankatshi pa kimeeno mushii mwa mwiya, na kyetu kimeeno lelo kumpala kw'Efile-Mukulu : « *Kilisto betukuudile ku mulawe wa mwiya, pa kwikala mulumbiibwe mulawe pa mwanda weetu (mwanda mbifundwe'shi : mulawe kwi yawa oso akwikala mupudikwe ku mutshi* ». Bena Ngalateya 3:13. « *Mwanda kyakya kishibaadi byakukitshika ku mwiya, mwanda ubaadi ubofule ku mbidi. Efile-Mukulu, pa kutuma mwana aaye nabeene*

mwifwanika dya mbidi ya mulwisho, na pa mwanda wa bubi, baatshibiile bubi kiimu mu mbidi, mwanda wa'shi kitungo kilulame kya mwiya kilombane kwatudi, atwe bashabatambuka muyile mbidi, anka muyile Kikudi » Looma 8:3-4. « *Mwanda bubi t'abukenumunu nya, mwanda'shi tanwi muushi mwa mwiya, anka nwi muushi mwa buntu »* Looma 6:14. Mwinakukumiina te muushi mwa mwiya nya; twi bapete bulungatu ku uno mwiya bwa'shi tupe Fumu ky'ekumi kya ku bupeta bweetu su ?

Takwi mwiya dingi awukitshika kwi bena kukumiina bwa'shi batushe ky'ekumi; mwanda binobino tatudi muushi mwa lusa, twibapeebwe bulungantu bwa kutusha kwi Fumu na kifulo muyile byadi mwitukitshine. Mu kikitshino, abikakitshika mu kino kipaso : « *kwifuku dyoso dya kwibedi dya lubingo muntu oso a nunkatshi Mwenu atuulu ku lupese aye kii kwaye, atuule muyile byadi mupete bu makasa, kukyeba'shi, pankekala mufikye takukakitshikanga lupungo »*. 1 Bena Kolente 16:2. Mwina kukumiina oso atulu lukulupilo lwaye mwi Fumu abitungu awukye'shi Efile-Mukulu naaye amupa myabi efuku dyoso. Atukalesha bipatuwilo abilondo :

1. Kupa Fumu, takumupa muyile mwiya wa ky'ekumi anka muyile « *kupeta kwetu (suunga na myabi)* » ; abyabya abimika mwiya wa kutusha ky'ekumi muyile kilombeene kikulu su ? Bino abipa mwina kukumiina byadya kuwuka'shi takii mu kitungo kya kutusha muyile mwiya, anka mupashibwe ku mwiya wa ky'ekumi, anka muyile kupeta kwaye, akatusha na bikile ky'ekumi mu kifulo na buntu kwi Fumu ! Ngi kya buntu kyakutusha muyile kupeta kwaye .
2. Saa kini ilombeene kutusha makuta suunga kuula kwa bintu ? « *efuku dya kumpala dya lubingo* » twele meeshi'shi Fumu mwitwelele myabi mafuku oso a lubingo lubaapu mu dya mpooso, twi balombeene kutuula ku lupese bwetu bukwashi bwa efuku dya kumpala dya lubingo. Mu mukanda wa 1 Bena Kolento 16, mutumibwe akula mwanda wa kutusha suunga kupa balanda ba ku Yelushalema. Kubaadi eyendo lukalo. Bibaadi buwa'shi bena kukumiina bawukye bushito bwabo bwa kukwasha bangi bakwetu muyile byabya bya bapete. abitungu kukita lupungo, babaadi abebikitshi saa yoso, ntanka penda saa ayifiki mutumibwe Mpolo nya, anka muyile namu myabi ibape Efile-Mukulu.
3. Mushindo kini ukumbeene kulumbuula bwetu bukwashi ? Atwibutuulu « *kulupese* » bangi namu'shi bibofule kutuula bukwashi bwabo bwa lupungo mu kakongye, bangi namu'shi bibuwa kutuula mu kingi kipaso na kepatshila kakampanda. Twi bulungatu kumpala a Fumu. Mu bipaso byoso abitungu kutuula « *kulupese* ».

Ta bikumbane bangi bantu ba mu kakongye kwakula'shi atwe twibisumanga. Tubaadi na muloo, mu ingi saa pa kumona batabo abafiki na byumbulwanga na kwibitusha kumpala kwa Fumu saa ya lupungo mu kakongye. Bi baadi kikitshino kibuwa bwa kupudisha nkalo ya baaba bafudile na bakashi babafwe. Ku byabya abikyebe kuwuka'shi mwina kukumiina ebupenka na matalwa kumpala kwa Fumu, ku kyakya kyatusha na'shi kipaso kini kya kutusha. Su kino kiwubishi kya kupaana tweekituula mu kikitshino, nkalo yetu mu kakongye na mufubo wa Fumu tatukewupudisha oso su ?

Mutemuki Malashi baadi mutopekye bena Isalele. Tupusheeyi byakula : « *Kubanga kubankambwa benu mpaa na lelo, nwi [bafutaale] bapele milangilo[miya] yande tanwi beyilame nya. alukayi kwandji byabya ami namu nakaaluka kwanudi ank'anwe anunyipusha'shi : nkipaso kini kyatudya kwaluka kodi ? mbande kwinwipusha bino : bana ba bantu mbalombeene kwiba bintu byande'mi Efile-Mukulu su ? Nya ! Suunga byabya anwe nukwete kwiba bintu byande ! su nwangipusha'shi : ankipaso kini kya tukwete kwi biba ? nakaaluula'shi : nyi mu kukutwa kwenu kwa kutuusha by'ekumi na milambu ayitungwa »*

Malashi 3:7-8. Bu mbyabidi'shi tatwi dingi mushii mwa mwiya, anka mu lusa ; tatwi na dingi mwiya wa kulonda. Fumu etupa bulungatu bwa kutala muyile kipaso kyatupete. Twikale balamate kwi « *Yawa mwitupe mwabi wa mu Kikudi mu mawulu kwiwulu mu Kilsto »* Bena Efeso 1:3. Aye eselele !

Kilombeeno kipya akifudiisha namini pa mwanda wa bya buntu ? « *Mwanda su bukidi bwa kutuusha bwi kwanka bii buwa muyile byatudi nabyo, kushii muyile byatushii nabyo »* 2 Bena Kolente 8:12.

« *Kutala namu [namba] bino : yawa akunu bipeela akawumbula namu bipeela, na yawa akunu bifiime akawumbula namu bibungi. Muntu oso [akite] muyile byadi mwibipwandjikishe mwishimba dyaye, kushii kwinyongola, suunga'shi kushii bu pa bukopo, mwanda Efile-Mukulu akumiina yawa atusha na muloo. Anka Efile-Mukulu ena bukome bwa kufimisha mwabi oso kwatudi, bwa kwikala mafuku oso na bintu bilombeene, bwa nudya kutama mu mufubo oso wi buwa ... anwe namu pakwikala bampeta mu bipaso byoso pa mwanda wa bukwashi bwenu, abufwisha kwatudi lutumbu kumpala kw'Efile-Mukulu »* 2 Bena Kolente 9: 6-8,11.

Mu kilombeeno kipya, atusangana bingi binangu bya Fumu Yesu, pabaadi atala mu kitumbwilo, baadi mumone ungi mwana mukashi a mufwe mulanda beelele pita ibidi : « *Na bambile'shi eyendo nenulungula'shi : yawa mukashi a mufwe mulanda beele kukila booso, mwanda bano booso babeele mu milambu [y'Efile-Mukulu] nsubusubu yaabo, anka uno*

mukashi beele bya ku lukalakashi lwaye, byoso byayikalanga nabyo bya muwa waye » Luuka 21:3-4.

Kibaadi kileshe bu ki buwa, ta bungi bwa makuta abaadi mutushe nya, anka bungi kini bu baadi mushale nabo aye bapu kutusha? baadi mupe Efile-Mukulu oso abaadi nao! Mutumibwe Mpolo atentekeyesha dimo: « *Mwanda anuwuku buntu bwa Fumwetu Yesu Kilisto, bibaadi mpeta, bayikeele mu bulanda pa mwanda weenu, bya'shi ku bulanda bwaye nwikale bampeta »* 2 Bena Kolente 8:9.

Fumu alungula beeyi baaye kumpala kwa kwibatuma ku mufubo: « *nubapete bisumanga, nupaane bisumanga »* Mateo 10:8 Twikale na nshalelo muyile byabya abikyebe Fumu kwitumona na kuwuka'shi kwete kwitumono na awuku byoso!

Kunfudilo, atumono mutimibwe Mpolo asamuna na muloo tukongye twa ku Masedwane, byabaadi batushe bya ku maasa kwabo bwa Fumu, mpana mu bulanda bwabo: « *Byabya bakwetu, atwinuwukisha buntu bw'Efile-Mukulu bupeebwe [bena selele] be mu tukongye twa Masedwane: kwamba'shi, mu kutompiibwa kukata ku byongwa, bukata bwa muloo waabo na bulanda bwabo bibafiimi mu bupeta bwa kupaana kwabo kwa bii ku maasa. Mwanda muyile kupeta kwabo (nebituulu bukamoni), na [mbakite] kukila kupeta kwabo, babetutekyele na kushishikila buntu na buwumune ku uno mufubo wa kukwasha bena selele na kushii [penda] bu byatwikeele bakulupile; anka mbepaane abo banabeene kwibedi kwi Fumu, na akupu namu kwatudi, ku kikyebe ki'eshimba di'Efile-Mukulu »* 2 Bena Kolente 8:1-5.

Buno buntu, bukitshikye mu lutato, bibaadi kilesheso kya kifulo na lutumbu kwi Fumu. Twikale na lutumbu kwi Fumu na'shi makasa aye ekale eetu namu!

Na pano, tubashinkalisha matalwa eetu kwi Fumu. Atukyebe kubunga pamune bino abilondo mu kipaso kya kilombeene kuludika suunga kutumikisha makuta ashale aku bupeta bwetu, twina lukalo lwa kuwuka bungi bwa mafuku aakidi bwa kupeta angi makuta. Byabya bi kwikala pangi lubingo, mweshi, suunga dingi mafuku ebungi. Abintungu tutushe suunga kulesha kipaso kya kuyiila na myanda ya kumpala na ikata ilombeene kutumikisha makuta. Byabya bya kukita kumpala kwa bintu byoso, ambikekale bilondeene bino:

1. Kutusha makuta pa mwanda wa kuula bintu bya kudya, bya kufwala, na bingi bya kuula bwa kifuko kyetu ki peepi [Kupatuula kwamba'shi: kifuko: Yaya, Mukashi na bana].
2. Kutusha makuta pa mwanda wa mifubo wetu ya tutumika [Bintu bya mifubo].
3. Kutusha makuta pa mwanda wa bukome bwa mbidi [saa yatudi na maladi na ingi myanda ya kukalwila mbidi ku malady].

4. Kutusha kwa makuta muyile bushito bwetu suunga matalwa etu kwi : betutande, bakashi ba bafwe; suunga byabya abitungu twele binangu kalolo kumpala a kutusha makuta.
5. Binobino su tubashala na angi makuta ku maasa kunyima kwakupwa myanda ikata, ano namu abashala ngi atudi na bulungatu bwa kwi akitshisha muyile byatumono suunga ku mufubo wa Fumu, suunga bwa tungi twipatshilo.

Kwi ungi mwanda awutungu kutoosha : tatwibalombeene kutusha makuta atushibapete ku wetu mufubo nya.

Su twibisumanga ku maasa, takwikutusha kwa makuta atushi nao nya. Byabya abitamisha myanda mu mafuku ekumpala. Lungi lupese, myanda ayimweneka ngilekeene kwi bantu na bantu. Ngi pa mwanda kini Fumu etupa bulungatu bwa kwata kitshibilo mu kipaso kya kutumikisha byabya byadi mwitupe.

Kino kipindji kya kano kakanda : 16. Kyaluulwe mu Kisongye mu Kabinda, mweshi 12 mu kipwa kya 2025 kwi

bakwetu bano : Arthur NYINDU ASSANI, na Esther KIMANKINDA YANGONGO.

©C.E.R.S

B.P.1673 Kananga

République Démocratique Du Congo

Email : 33eme.cers.lit@gmail.com

<http://www.33eme-cers.org>